

巢經巢全集

第一函
第九冊

樂

經

樂

前溪吳鼎昌署



中華書局
出版

巢經巢全集卷首敘目

遵義趙

愷編訂

序

國史傳

墓表

鄭徵君傳

行述

頌

誄

呈文

年譜

書目

巢經巢全集序

學術爲民族思想之精英其振興弛廢有繫於國家之隆替時值艱危我民族精神愈趨發揚扶植固有學術以翼復興大業舉國上下咸有同心肅昌奉命主黔於有關貴州文化之著述頗欲廣其流傳爲國學之一助嘗擬擇其要籍梓行一二以爲之導願以所職繁曠初未能致力及此稽遲至今始以鄭子尹先生巢經巢全集付諸刊行殆償蓄念之一抑亦此事之嚆矢也先生爲清代鉅儒著述宏博學問文章非僅爲黔省傑出在吾國學術史上固已特樹一幟所作如儀禮私箋鄭學錄親屬記經說或闡明古代禮制以釐正近世學說或考鏡經術源流爲來賢樹一準的如說文逸字說文新附考汗簡箋正則有功於文字學跨越鈕非石苗先麓諸家不徒衍段王餘緒其輪輿私箋鳬氏圖說爲工程學之專著樛繭譜裨利實業堪以倡導母教錄敦純孝之思播雅見表揚文獻之誼餘事爲詩文並雄博古茂詩尤卓絕同時莫子偁先生推先生經

術第一文章第二歌詩第三有詩易見才恐他日流傳轉歷兩端之語近如陳石遺梁任公均矢口交推欲擬爲晚清詩家之冠第先生各種著述雖經傳世然自望山堂所刻五種外餘皆爲各省書局或私家鈔本板式不一收求復難矧以零星哀集殊非大觀爰爲彙印庶收蒼萃之功且以便於學林並以其哲嗣伯更先生之作附經第五區行政督察專員劉千俊君之籌畫付刊暨遵義趙乃康君之校讎編訂努力孔多輒書弁首以志倡刊之顛末云

中華民國二十九年

前溪吳鼎昌序

巢經巢全集序

士有窮昕夕殫心志以治其學者其不與世相聞也久矣旣而賢君子從之遊而公侯大夫咸思接其形貌承其語笑於是世始知所嚮往斯則鄭先生子尹之所爲也先生尊許鄭宗程朱明三禮湛六書至於歌詩圖續罔不博究而兼精家益貧而學彌勤遇屢乖而志未嘗稍懈當是時世固未有知先生者迨曾相國蔣生之欲禮致也則閭巷孺子莫不囂然以先生之學相矜詡顧世之以知先生者徒以其誦詩之雄耳抑亦先生之末矣且先生嘗以荔波猝合之軍從容而破衆寇城得不隳民恃以安非夫勇智絕俗者其能若是乎蓋先生之蘊於中者豐矣豈僅低回諷詠以區區誦詩稱於世哉雖然先生嘗越萬餘里而抵京師終不得聘於有司遂以其憂憤紆悵之懷歸而愈肆力於學故其於學綜上下而俱備洞內外而不惑然則先生之終不得聘於有司者此其所以成於學也

千俊下車遵義之初曾祭先生之墓於子午山嗣與其地名宿趙

君迺康謀刊其全集以廣先生之學於四方適前谿 吳公來撫黔中惓惓以
剏闕先生之全書倡於上自茲議迺定是則 吳公之功殆將與先生之學並
廣於四方矣 千俊 亦得以僊俛列名於其後獨不謂厚幸歟因書爲之序

中華民國二十九年六月

湘潭劉千俊

遵義鄭徵君遺著序

嘗讀鄭君康成易贊及易論謂易一名而含三易易簡一也變易二也不易三也鄭君闡發三易邇爲精塲余常引中斯旨不厭易言之羣經亦多言之且推暨於國家政事之治亂興衰制度文物之因革損益世道人心之純駁汗隆學術文章之得失正變胥可以三義囊括之易道廣大精微固無所不苞孕也遵義鄭子尹徵君以樸學崛起西南蔚爲儒宗生平服膺家學精研三禮撰述閎博著鄭學錄揭櫫爲學大義嘗以國朝經學昌盛邁越往古乃極盛之後治禮者漸有標新增怪名爲申鄭實違鄭旨甚則轉以駁鄭以勝鄭爲事見徵君所爲康成生日釋奠詩然此特致辨今古異同已爾經學廢興固無鑿也顧已深致歎喟如此烏知後之惑經僞經汙至學校廢經不讀而經亡經亡而國隨之徵君有知其哀痛又如何耶徵君旣墨守家學以治經所爲文章實能貫串攷據義理詞章而一之於忠孝節烈尤蹇蹇焉又所爲詩奧衍淵懿勳然深秀屹

然爲道咸間一大宗近人爲詩多挑唐而禡宋號爲步武黃陳實則巢經一集
乃枕中鴻寶也徵君遭際多艱困阨憂虞仍不沫其事親孝敬之誠讀其詩文
者使人孝悌慈諒之心尊君親上之義油然而勃然不能自己所謂詩以導性情
禮以飭倫紀有功於世教者甚大常以黎平何忠誠墓圯作詩董勸修葺胡文
忠守黎平卽踵爲之其徵諛也莫邵亭先生謂徵君詩必先經學文章流布於
世豈非以其感人尤摯耶變龍少時酷嗜徵君詩比官京師嘗手鈔諷籀僑居
海上乃蒼最徵君詩文重璫哲嗣伯更詩附焉光宣之際維新立憲制作紛然
至不易簡矣又所爲變易者往往規撫外人創趾適履鑲舟求劍拘於迹而不
覩於用比至天地易位竟有舉關於綱常名教之不可易者幾幾而變易之勢
非至人類與窮塵劫灰同歸漸滅不止可不懼哉可不懼哉校葉徵君詩文竟
因紬繹康成三易之旨以證徵君經術文章不淪家學者斬救世於危亡垂絕
之交徵尙如斯竊以貢讀徵君詩文者一證之若謂流行鄉先誥遺著者抑亦

末也己乙卯十月貴陽陳夔龍



清史儒林傳

鄭珍字子尹貴州遵義人道光五年拔貢生十七年舉人二十四年大挑二等以教職用選荔波訓導咸豐五年叛苗犯荔波縣令蔣嘉穀病珍率兵拒戰卒完其城苗退告歸同治二年大學士祁寯藻薦於朝特旨以知縣分發江蘇補用卒不出三年卒年五十九

據子知同行述

珍初受知於歙縣程侍郎恩澤詔之曰爲

學不先識字何以讀三代秦漢之書乃益進求諸聲音文字之原與古宮室冠服之制方是時海內之士崇尚攷據珍師承其說實事求是立異不苟同卽已洞知諸儒者之得失復從莫與儔游益得與聞國朝六七鉅儒宗旨

藥子尹先生行

於經最深三禮謂小學有三曰形曰聲曰義形則三代文體之正具在說文

若歷代鐘鼎款識及汗簡古文四聲韻所收奇字旣不盡可識亦多僞造不合六書不可以爲常也聲則崑山顧氏音學五書推證古音信而有徵昭若發蒙誠百世不桃之祖義則凡字書韻書訓詁之書浩如淵海而欲通經訓莫詳於

段玉裁說文注邵晉涵郝懿行爾雅疏及王念孫廣雅疏證貫穿博衍超越前古是皆小學全體大用別有漢隸學號專門卽下至六朝分隸亦並當精識然後茲學源流備舉罔遺闕一不可其讀禮經恆苦前儒聚訟營視惑聽賴有國初諸老出權衡得失審當莫如康成爰奉爲圭臬反覆參詳止求明注不遽詰難厥功不亞孔賈乾嘉以還積漸生弊號宗高密又多出新義未見有勝十九并駁說愈繁而事愈蕪較前古爲尤甚故言三禮墨守司農不敢苟有出入至於諸經率依古注爲多謂宋後儒者喜變亂舊說未免憑臆逞私或無足徵信國朝專力復古事必根據然後敢言故若胡渭考禹貢陳啓源闡毛鄭詩張惠言通漢易之類精確異常絕學獨有千古信吾師也又以餘力旁通子史類能提要鉤玄儀禮十七篇皆有發明半未脫稿所成儀禮私箋僅有士昏公食大夫喪服士喪四篇而已周禮有考工輪輿私箋龜氏圖說禮記有深衣考小學有說文逸字說文新附攷汗簡箋正說隸他若說文大旨轉注考又有諧聲釋

名證讀先秦古書讀皆未成又有巢經巢經說詩鈔文鈔明鹿忠節公無欲齋
詩注而所撰遵義府志古今文獻蒐羅精密好古之士欲考鏡南中爭求是書
比之華陽國志行狀珍嘗謂遵義漢牂牁也自郡人尹珍道真從許慎應奉受經
書圖緯教授南域後無有以經術發聞者於是以道真自命而取以爲名故學
成褒然爲西南巨儒焉



鄭徵君墓表

黎庶昌

先生諱珍字子尹晚號柴翁姓鄭氏其先吉水人七世祖益顯爲劉綏部將以明萬歷庚子從平播縫班師被論回衛益顯領舊兵屯防水煙遂爲遵義人曾祖某祖學山縣學生員考文清兩世精醫衍德於術妣氏黎子姑也先生自幼精力獨過絕人寓目輒能記誦予世父雪樓公以憂歸自桐鄉多蓄典籍先生以甥行學於舅家悉令鼓篋讀之恆達旦夕肘不離案衣不解帶數年而學以大明道光五年選拔貢生受知於歙縣程侍郎恩澤侍郎詔之曰爲學不先識字何以讀三代秦漢之書先生大感悟益進求諸聲音文字之原與古宮室冠服車輿之制方是時海內崇尚考據名曰漢學從者波靡先生師承其說實事求是立異不苟同卽已洞知諸儒者之弊治經宗漢析理尊宋踰二年復從侍郎於湖南歸而與府教授莫猶人先生游益得與聞國朝六七鉅儒宗旨久之經術益大涵肆莫可殫詰先生之爲學其孤詣有可得而言者矣其初實致